

## **d Fasnachtsvärse 05 vo de Zibelegringe**



My Hund, dä tuet a ds Bundeshus pisse,  
u näbedra vor d Nationalbank schysse.  
Wott grad zum Robidog, scho steit eine da,  
u bietet mer e Bytrag vo der Pro Helvetia...

Ab uf z Rad, seit der Dracula,  
jetz fangen ig als Veloprofi aa,  
Phonak suecht Lütt, das trifft sech guet,  
dert gits ja geng so frisches Blut!

Der John F. Kerry fluechet wie ne More,  
wäge Ohio hett är gäge Bush verlore.  
Bi de Bärner Wahle hett Schori zu Guggi gseit:  
"O Hayoz", üs isch es abverheit!

Im neue Klee-Museum, hei mer dänkt,  
würde alli Bilder vo däm Klee uf-ghänkt?  
Doch si blybe trennt, wäg Nyd und Unvernunft  
vo ryche Grufties us der Chnocheschlosser-Zunft!

Knusper, knusper, Knäuschen,  
wer knuspert an meinem Häuschen?  
Es isch Dora Andres vo der Polizei,  
si suecht für ihri Asylante es neus Hei...

Es schynt, der Bundesrat syg ständig uf der Reis,  
vor allem Couchepin, Calmy-Rey u ou der Deiss.  
Die mache sech vermehrt uf d'Socke,  
wei nid geng mit em Blocher zäme hocke!

Der Mitholz-Autotunnel hett o d BLS erfreut,  
si hei e Huuffe NEAT-Schutt druf abe-gheit.  
Hütt isch me uf dä Blödsinn nümm so stolz,  
s isch jetz es Tunneli verstärkt "mit Holz"...

Jetz isch o der FC Servette pleite ggange,  
wäg de exotische Plagöri, wo ne hei la hange.  
D Gänfer tüe drum a die arme Zürcher danke,  
u wei ne z neue Charmilles-Stadion schänke!

Für 60 Millione wott me um z Verrecke  
der Bahnhofplatz verblöde u chly überdecke.  
Tüet doch, statt der Baldachin-Glas-Wälle,  
lieber d Rytschuel under ne Glogge stelle!

Nid nume am Bundesgricht wird gspöit,  
nei, o bim Schutte, we s grad geit,  
Sogar der Fuessball-Presi, wo sy d Maniere?,  
spöit uf alli, wo ne wage z kritisiere.

Dank Bahn2000 fahrt me jetz im Zug  
vo Bärn nach Züri wie im Flug -  
u zrüg vo Züri genau so schnäll:  
das weiss jetz ou der Härz-Chirurg Carell !

Bahnhöf, Post u Läder wäg-rationalisiert,  
Armee und Airline um d Hälfti reduziert.  
geits wyter so, louft nüt me hie -  
de cha der Bundesrat i ds Sahleweidli zieh...

Der Bundesplatz wird multifunktional:  
als Badi, Langloupfiste, für Beach Volleyball,  
für Demos, Häppenings u andere Gugus -  
der Märit, dä isch näbedra, im Bundeshus!

Mi hätti gärn a d Ski-WM in Bormio  
di beschte Fahrer us der Schwiiz mit gno.  
Aber die sy, wi mir hei use gfunde,  
am Louberhorn no nid ganz dunde...

Ir Understadt tüe si bohre u loche,  
die schönste Gasse wärde ume-gstoche.  
D Archäologe hei derby, tief unde,  
alti Plän vo me Tram nach Bümpliz gfunde...

Ha gmeint, 200'000 pro Gmeindrät sygi gnue,  
doch nei, die Cheibe gäh nid Rueh!?  
3 Gmeindräts-Froue weis zwar la bewände,  
für e arme Wasserfallen sueche mer Spände...

d FDP vor Schwiiz, es hett kes Änd,  
suecht scho wieder e neue Presidänt.  
öpper, wo der Ton a-gäb, das isch ja klar -  
de näht doch jedes Jahr der neu Musicstar!

M Budget und Prix Garantie, das sy d Renner:  
alls chly billiger, ob Migros, Coop und Denner.  
Nächstens chunnt de der Lidl u der Aldi no,  
de wirsch allwäg sogar no use übercho...

Hüür fählt e alt-bekannti Schnitzelbank:  
Isch ächt d Näbuchräje chrank?  
Nei, aber us luter Angst blybt si im Quartier,  
d Frou Zölch hett nämlech d Chräje im Visier...

Nume 5 statt 7 Gmeindrät gits jetz no,  
u derby sy grad 3 Froue yne-cho!  
Jetz wird üse neue Stapi allwäg flippe!?  
Chasch danke, das sy nid syni Cüpli-Party-Type!